

# Buka puasa di padang tidak dibenarkan

Asrol Awang - April 12, 2021 @ 11:08am

[bhnews@bh.com.my](mailto:bhnews@bh.com.my)



Kerajaan Pahang tidak membenarkan berbuka puasa santai di padang MBK 1 seperti sebelum ini.

KUANTAN: Kerajaan Pahang tidak membenarkan orang ramai berbuka puasa di padang Majlis Bandaraya Kuantan (MBK) 1, di sini sepanjang Ramadan tahun ini.

EXCO Kerajaan Tempatan dan Perumahan Pahang, Datuk Abd Rahim Muda, berkata keputusan itu bertujuan mengawal penularan wabak COVID-19.

"Kerajaan negeri meminta masyarakat Islam di daerah ini yang berhasrat berbuka di padang MBK 1 akur dengan arahan yang ditetapkan," katanya ketika dihubungi hari ini.

Setiap kali Ramadan, padang MBK 1 menjadi tumpuan masyarakat di daerah itu berbuka puasa secara santai bersama keluarga.

Pada masa sama, bazar Ramadan yang beroperasi berhampiran padang MBK 1 turut memudahkan orang ramai untuk membeli juadah berbuka.

Mengenai jumlah peniaga bazar Ramadan di seluruh Pahang tahun ini, beliau berkata, seramai 1,836 orang dibenarkan berniaga di 58 lokasi.

Katanya, MBK merekodkan jumlah peniaga paling ramai iaitu 885 orang membabitkan 25 lokasi.

"Semua peniaga diminta mematuhi prosedur operasi standard ( SOP) iaitu pemakaian pelitup muka, penjarakan fizikal satu meter, pemeriksaan suhu dan kebersihan gerai.

"Peniaga diwajibkan menutup makanan sepanjang masa dan dilarang menggunakan bekas bungkusan makanan daripada styrofoam.

"Namun, peniaga dibenarkan menggunakan kertas pembungkus khas atau pembungkus plastik High-Density Polyethylene (HDPE)," katanya.